

CENTRALNA BANKA BOSNE I HERCEGOVINE

Na osnovu člana 7. tačke b. Zakona o Centralnoj banci Bosne i Hercegovine ("Službeni glasnik BiH", 1/97, 29/02, 13/03, 14/03, 9/05, 76/06 i 32/07) i člana 52. Pravilnika Centralne banke Bosne i Hercegovine, UV broj: 120/05 od 29. juna 2005. godine, Upravno vijeće Centralne banke Bosne i Hercegovine, na 5. sjednici od 23. decembra 2009. godine, donosi

ODLUKU O USLOVIMA POD KOJIMA SE MOGU REPRODUKOVATI NOVČANICE I KOVANI NOVAC

1. Ovom odlukom uređuju se uslovi pod kojima se mogu reprodukovati novčanice i kovani novac koje Centralna banka Bosne i Hercegovine (u daljem tekstu: Centralna banka) izdaje u skladu sa Zakonom o Centralnoj banci Bosne i Hercegovine.

Pod novčanicama i kovanim novcem iz stava 1. ove tačke podrazumijevaju se novčanice i kovani novac koji su u opticaju (novac podoban za opticaj), kao i novčanice i kovani novac koji su povučeni iz optičaja (novac nepodoban za opticaj).

REPRODUKOVANJE NOVČANICA

2. Reprodukovanjem novčanice, u smislu tačke 1. stava 1. ove odluke, smatra se svaki štampanjem ili drugim postupkom (kopiranjem, preštampavanjem i dr.) umnožen crtež, slika ili bilo koji drugi oblik prikazivanja (u istim ili različitim dimenzijama) cijele novčanice ili nekog njenog dijela, tj. elemenata novčanice koji su propisani aktom Centralne banke kojim se utvrđuju osnovna obilježja novčanice.

3. Novčanica se može reprodukovati samo po predhodno pribavljenoj saglasnosti Centralne banke.

4. Saglasnost iz tačke 3. ove odluke Centralna banka izdaje na osnovu podnesenog zahtjeva u pisanoj formi, uz koji se dostavlja i detaljan opis reprodukovane novčanice.

Pri odlučivanju o zahtjevu iz stava 1. ove tačke, Centralna banka naročito cijeni da li način na koji je novčanica reprodukovana može izazvati zabunu u odnosu na originalnu novčanicu, ili reprodukovana novčanica može nanijeti štetu ugledu Centralne banke.

REPRODUKOVANJE KOVANOG NOVCA

5. Reprodukovanjem kovanog novca u smislu tačke 1. stava 1. ove odluke smatra se reprodukovanje koje se vrši u sljedećim slučajevima:

- na slikama i crtežima kovanog novca, kao i u filmovima u kojima je prikazan,
- na materijalu potpuno različitom od materijala od kojeg se izrađuje kovani novac,
- ako je reprodukovanjem uvećan najmanje 100%, odnosno umanjen najmanje 50% u odnosu na originalni kovani novac (stvarnu veličinu kovanog novca).

6. Odredbe tačkaka 3. i 4. ove odluke o saglasnosti za reprodukovanje novčanica, shodno se primjenjuju i na reprodukovanje kovanog novca.

7. Ova odluka stupa na snagu danom objavljivanja u „Službenom glasniku BiH“, a objaviće se i u „Službenim novinama FBiH“, „Službenom glasniku RS“ i „Službenom glasniku Brčko Distrikta BiH“.

100-UV broj: 29/09
23. decembar 2009. godine
Sarajevo

Predsjedavajući
Upravnog vijeća Centralne banke
Bosne i Hercegovine

GUVERNER
dr Kemal Kozarić